


pentes gangrænas causaturos: aut sanguinem nimis densum & immeabilem in eadem vasa vitalia cerebri, pulmonum &c. impingi, subsecuturis itidem vehementissimis inflammationibus, suppurationibus aut gangrænis, plerumque inevitabilis interitus causis (a).



## DIVISIO FEBRIUM.

### THESIS XXIV.


**O**Mnes febres communiter & primariò dividuntur in duas classes continuarum & intermittentium.

Quidquid febrium est, ad hasce duas classes reduci potest, ut ut cæterū ratione aliorum symptomatum diversissimas facies exhibeant. Centena quidem nomina febrium reperias: sed haec quemadmodum a singulari quodam symptomate profecta sunt, ità particulares febrium affectiones declarant, ipsas verò classes primarias non immutant, uti ex sequentibus patebit.

Fundamentum autem hujus divisionis in modo constitut, quo febres omnes solent decurrere: vel enim conceptam pulsū velocitatem aliisque caloris & ægritudinis symptomata usque ad finem morbi continuant, vel diversis accessionibus statu tempore redeuntibus decursum suum absolvunt. Itaque

### THE-

(a) BOERHAV. Aph. 592. Vid. v. SWIETEN Comment. in prædictos Aphor.



## THESIS XXV.

**F**Ebris continua est, cuius omne tempus una accessio est a principio ad solutionem usque (a).

Sive quæ motum febrilem semel excitatum uno impetu ad finem perducit (b). Ità ut à primo invasionis tempore usque ad finem morbi semper eadem, nec ullâ notabili remissione aut intermissione interrupta sit, licet remissionem generalem instar aliarum febrium initio & fine pro stadiis suis obtineat.

## THESIS XXVI.

**F**Ebris intermittens illa dicitur, quæ plures paroxysmos certis intervallis, quibus febris abest, distinctos habet intercedente plenariâ apyrexia.

Cùm prima febris accessio, postquam aliquamdiu duravit, sensim ità defervescit, ut nihil postea de febre seu pulsu velociore amplius supersit, quamvis æger adhuc aliquam ægritudinem sentiat, febris vocatur *intermittens*, quamdiu nempe hunc decursum servat. Si verò aliquid pulsus febrilis inter singulos paroxysmos remaneat, sopitis licet aliis symptomatibus, tantum *remittens* est.

*Paroxysmus* est recrudescentia febris anteà sopiræ in intermittentibus: in continuis verò est tempus morbi vehementius ob graviora & copiosiora symptomata (c). Dicitur etiam exacerbatio, accessio &c.

*Apyrexia:*

(a) GALEN. de Febr. Lib. 2. Cap. 2.

(b) BOERH. 727. Aph.

(c) Vid. BARTH. CASTELLI Lexicon Med.

*Apyrexia* sive intermissio est plenaria paroxysmi aut febris totius cessatio saltem quod ad symptomata essentialia. Sepotitis tantisper intermittentibus continuarum ultiores divisiones prosequemur.

## THESIS XXVII.

POrrò febres continuae vulgo subdividuntur ab auctoribus in continuas simpliciter tales, continentes dictas, & in continuas remittentes.

Hanc febrium continuarum divisionem afferemus intelligendorum veterum scriptorum causam, quamvis eam, nostro sub cœlo saltem, obtinere non arbitremur, ut ex sequentibus patebit.

## THESIS XXVIII.

FEbres continuae simpliciter tales, græcis pyreta synechonta, quarum definitio *Thes. 25.* data fuit, ex *Pathol. Method. DE SAUVAGES* numerantur sequentes.

1. *Ephemera*, si ultra 24. horas non excurrat, *simplex dicta*, levissima febris, vitæque periculo carens, vix aliis symptomatibus stipata, quam calore miti, lassitudine, levi dolore capitis, & siti: suscitata a levissimis causis externis, in corpore puro, seu nullo humorum vitio laborante, a calore nimirum vel frigore externo, motu majore, potu calefaciente, ingluvie leviori, perspiratione prohibita &c. Si ad 4. dies producatur, *prolongata seu plurium dierum Ephemera* dicitur.

Ephemeram hanc plurium dierum alii vocant synocham inflativam, eò quod sub illa corporis habitus quasi

inflari videatur, & materies exanthematica benigna e. g. in morbillis & variolis ad cutis superficiem propellatur.

In hisce Ephemeris omnes humores boni sint, nec ulla prædispositio morbosa adsit necesse est, alioquin in synochum putridam abeunt: solus humorum motus concitator peccat.

2. *Synochus simplex* sive non putris ad integrum septimanam decurrens, aliquantò gravioribus pluribusque symptomatibus affligens, secuta easdem causas, sed paulò intensiores, efficientes copiosiorem & tenaciorem materiem morbosam in corpore, cæterùm ad eam subigendam vel expellendam debiliore.

In hâc nullum quidem vitium humorum præcedit, sed infertur illis aliqua saltem mutatio per causas procatarcticas & per ipsam febrim parumper degenerant fluida.

3. *Synochus putris*, sive continua putrida ad duas trésve septimanas excurrens, iisdem quidem causis procatarcticis excitata, sed incidens in corpus notabili pridem humorum corruptelâ prædispositum, multò graviora symptomata, deliria, cephalalgias, nauseam, vomitum, siccitatem, æstum, pulsum inæqualem &c. vitæque periculum afferens, imprimis calore mordaci & manum applicatam quasi pungente dignoscenda.

*Nihil suave, nihil moderatum neque ephemeris simile habet hæc febris, sed mordax potius quodammodo est, ut lædat, mordatque tactum veluti fumus oculos ac nares (a).*

4. *Hætica* vulgò lenta febris, quæ ultra quatuor hebdomadas ad septimam & diutiüs durat cum lentâ consumptione corporis.

## THESIS

(a) *GALEN.* de Febr. diff. L. 1. Cap. 9.

\*) ( \*

## THESIS XXIX.

**U**Tilissimum est tyroni, sed non adeò expeditum, prænoscere, utrum incipiens febris futura sit non putris, sive putrida?

Hoc criterium in eo latet, ut attendat *1mō* ad prægressa: utrum ægrotus laudabili, blandā, non acri nec spīruosā diætā sine ingluvie usus fuerit? an vehementioribus animi pathematibus, imprimis irā, mœrore, curis, lucubrationibus nimiis &c. immunis vixerit? *2dō* ad præsentia: an nulla signa notabilis cacochytiæ, acrimoniæ, & obstrucionis ex facie decolore aliifve phœnoimenis appareant? an aér sit purus non contagiosus? an symptomata mitia, pulsus æqualis & mollis, calor blandus, & roscidus cutè brevi humescente, urina naturali non multùm dissimilis &c. hæc si ita sint, rectè conjicimus febrem futuram Ephemeram vel synochum non putrem: Si his contraria adfuerint, contraria timenda sunt.

## THESIS XXX.

**P**Orrò putredinis nomen cùm apud medicos valde generale & multifarium sit, plurésque putridi species adnotet, variæ quoque febrium putridarum species occurunt.

Vera putredo locum non habet in corpore, nisi fortè in excrementis, quamdiu illud vivum est; sed tantùm initialis, dum nimirum humores a statu naturali multùm variéque degenerant & in putredinem vergunt, accidente motu & calore febrili magis magisque augendam (a).

Itaque

(a) Vid. v. SWIETEN Comment. in Aph. BOERH. 730. Pag. 419.

Itaque inter præcipuas numeramus

1. Febrem putridam biliosam, ortam ex bile varia corrupta in ventriculo, duodeno, hepate, liene, ipsoque tandem systemate sanguineo & seroso, post iracundiam frequentiorem, assumpta oleosa, rancida, facilè putrescentia, retenta diu excrementa &c. cognoscendam ex causis prægressis, temperamento bilioso, vomitu bilioso, dejectionibus putridis &c.

2. Febrem putridam scorbuticam sive dissolutoriam, oriundam ex humorum & sanguinis potissimum dissoluzione in salinum & oleosum volatile putridum valde acre (a). Hæc est eminenter putrida, maximèque opposita febri inflammatoriæ, caditque in corpora scorbuto calido contaminata ex longo usu ciborum & condimentorum alcalescentium, acrum, salitorum, semiputridorum, aquæ aërisque marini impuri aut contagiosi: ex abusu spirituum saliumque volatilium, aloëticorum, saponaceorum calidorum, aliorumque dissolventium alcal norum medicamentorum æquè ac venenorum. Dignoscitur specialiter ex vibicibus maculisque rubris, lividis, nigrescentibus in cute emergentibus; facili haemorrhagiâ narium, gingivarum, vesicæ; sanguinis arte vel sponte effusi tenuitate & dissoluzione (b); inter alia febrium putridarum gravissima symptomata. Ut plurimum maligna est, locis maritinis & stationibus castris militum familiaris, in nostra regione rarior, nisi afferatur per miasma contagiosum.

3. Febrem putridam lentam, nervosam dictam, causas prædisponentes habentem ex vappescentia, lentore & deficiente coctione humorum, in corpore debili, cibo potuque

(a) Vid. BOERH. de Alcalino spontaneo & JOAN. HUXHAM. de Febris. putrid.

(b) Vid. SIMON. PAULI Digressio de Febris.

tūque crudis, impuris, glutinosis, vappidis & insalubribus nutritio (utī pauperibus & in annonae caritate obvium est) mœrore, studiis & laboribus confecto vel nimis otioso, nimiis evacuationibus exhausto, aërem squallidum, crassum, humidum, vappidum spirante.

*Nervosa* dicitur ob juncta ordinariò symptomata hysterico - hypochondriaca ex ataxia & defectu spirituum oriunda.

*Lenta* dicitur, quia continua quidem, minùs tamen acuta est & tardiore motu sua absolvit tempora inter symptomata non adeò gravia ad conspectum.

Ut plurimum maligna & Epidemica est præsertim inter pauperes & miserè viventes.

Notæ caratteristicæ sunt morositas, anxietas, lassitudo, pallor, languor, nausea, oppressio pectoris, pauca fritis, stupor, dolor occipitis, sensus frigoris in vertice, deliria levia, fugacia, urina pallida vel opaca, pulsus celer, debilis, inæqualis (a). Distinguitur ab aliis lentis malignitate, deliriis, contagio epidemico. Quam diversa autem in diversis hisce putridarum febrium speciebus medendi methodus requiratur, nōrunt medici practici.

Neque hæ solæ & omnes sunt putridarum species: ex varia miscela & vario prædominio hujus illiusve putridi humoris, variisque solidorum conjunctis vitiis, ex GORTERI praxi generali addicendis, variae aliae febres putridæ emergunt: ut verissimum sit, talem semper futuram esse febrem, qualis est intemperies prædisponens fluidorum & solidorum jam antè contracta in eo corpore, in quod illa ex quibusvis causis occasionalibus incidit.

## THESIS

(\*) Vid. HUXHAM. de Febr.

## THESIS XXXI.

**A**D remittentes sive exacerbantes, pyreta epanachida HIPPOCRAT., ab eodem DE SAUVAGES referuntur

1. *Amphymerina* sive quotidiana continua, in qua singulis diebus exacerbatio, prægressa remissione, contingit, ita, ut singulae exacerbationes & tempore & vehementia, in quantum per stadia febris fieri solet, sibi mutuo respondeant; et si successivè, ut postea dicetur, & prævertant, & graviores usque ad vigorem fiant.

2. *Tritæus* sive tertiana continua, quæ alternis tantum diebus exacerbatur.

*Tritæus* duplicita erit, quando singulis quidem diebus exacerbationes incident, alternis tamen diebus graviores fuerint; ita, ut prima tertiae, tertia quintæ, secunda quartæ, quarta sextæ &c. & tempore, quo ingruunt & vehementia gradu respondeant.

3. *Tritæophya* sive febris tertiana continua æstuosior cum calore urente & siti inextinguibili, CAUSUS dicta. GORTERO *Tritæophyes* sive tertianaria febris est, quæ alterno die exacerbatur, sed plerumque inordinatè, sine plenaria apyrexia. GALENO est tertianaria adeò protracta, ut vel nulla vel exigua admodum intermissione fiat.

4. *Hemitritæus* sive semiterptiana, quæ uno die semel altero bis exacerbatur sine perfecta apyrexia. CELSUS hoc nomine tertianariam GALENI intellexit.

Est febris complicata ex quotidiana continua & tertiana intermitente (a). De qua HIPPOCRAT. (b) ait: *in semiter-*

(a) Vid. v. SWIETEN Comment. Tom. 2. S. 738. & ETTMÜLL de Febr. p. 306.

(b) Libr. Epid.

*semitertiana & multi & magni morbi fiunt: Id est, pessimæ & gravissimæ febres hoc schema semiterianæ induunt, omnè que ferè symptomaticæ & malignæ febres in illam incidunt, ut lypiria, astodes, lyngodes, phricodes &c.*

5. *Tetartæopbya* sive quartana continua, singulis tribus diebus exacerbata.

Hæc antiqua nomina, ait DE SAUVAGES ex BAGLIVIO, breviora esse & convenientiora neotericis ex Arabum & latino-barbarorum schola derivatis. Sed non reticendum, eadem intermittentibus æquè ac remittentibus febribus a scriptoribus græcis imposita fuisse (a). Non malè dixeris, febres remittentes compositas esse ex continuis & intermittentibus.

## THESIS XXXII.

**F**ebres continuæ nostri cœli potius sunt remittentes, quām continentes, exceptâ simplici Ephemerâ (b).

*Nulla ferè febris est, in qua non sensibiles symptomatum remissiones vel intermissiones conspicuae sint (c).*

Etsi verò hæc remissiones & exacerbationes non semper tam manifestæ sint in decursu continuarum, quām initio earum, aut in paroxysmis intermittentium; nihilominus obvium & facile est diligenti observatori detegere, aliquo tempore remissius ægrotum habere, postea verò exacerbari symptomata.

Dum ARETÆUS venæfectiones in pleuritide remissionibus accommodari jussit, ipsas adeò febres inflammatorias sub

(a) Vid. CASTELLI Lexicon.

(b) Vid. KLEINII Interpret. clin. p. 110.

(c) FRID. HOFFMAN. Med. Rat. System. Tom. 3. p. 18.

sub climate suo calidiore sibi remitentes esse vias innuit,  
multò magis id dicendum erit de continuis nostri cœli.

Saltem BRENDELIUS, doctiss. nuper Göttingensium Professor, cuius doctrinam de febribus dictando relixtam magni facimus, & in hac dissertatione passim sequimur, affirmat, neque se in saxonie vel inferiore vel superiore febres verè continentes observando potuisse deprehendere; neque ab aliis sub ipso æquatore adhibitâ studiosâ attentione eas observatas esse.

Una Ephemera, unico paroxysmo diurno nocturnōve finiri solita, strictè continens dici potest.

### THESIS XXXIII.

**I**Gitur omnis continua febris suas periodos habet, et si non tam distinctas, quam febris intermittens.

Periodus est decursus morbi, certâ exacerbatione & remissione, sive mitiori aliquo intervallo novoque impetu, distinctus. Febris intermittens has periodos suis paroxysmis distinctè exhibet.

### THESIS XXXIV.

**P**Eriodi continuarum ab initio quidem incertæ & obscuræ apparent, sunt tamen perpetuae non minus, quam in intermittentibus.

Primit præsertim diebus exacerbationes minus exercitatum fallere possunt specie febris erraticæ, donec febris typum suum induerit, & periodorum ordinem aliquem exhibeat, quod tertio demum 4tōve die spectari potest, dum exacerbationes illas singulis diebus vel alternis tantum sibi respondere pro vario febris genio comperietur. Sed dili-

diligentem observatorem postulant, aliás obscurā lenitate suā minūs attentum sēpissimē fugiunt.

### THESIS XXXV.

**H**Arum periodorum redditus cognoscitur exacerbatione sive augmento symptomatum.

Quo tempore celerior & major pulsus, calor & sitis auctior, aliisque symptomata molestiora vel acerbiora sentiuntur, nova periodus incipit: quo illa minuuntur & tolerabiliora fiunt, remittit. Interdum horripilacione nova periodus non obscurè indicatur, præsertim primis morbi diebus.

### THESIS XXXVI.

**O**rdinariò quotidie solent accidere, & spatio 24 horarum absolvī, ita, ut exacerbatio in vesperram noctémque cadat, remissio in antemeridianum tempus.

Jam pridem advertit **HIPPONCRATES**, noctes plus quam dies deliriorum signa præbere & pleuriticorum dolores noctu exacerbari. Nunc verò in vulgus notum est, febrientes vesperi & de nocte pejus, manè verò & per diem melius habere: quamvis hæc perpetua non sint ex causis infrà memorandis.

Ordinariò nycthymeri spatio una tantum periodus accidit & ab exacerbatione ad remissionem decurrit, quo casu febris vel Amphymerina vel tritæus duplicata erit: si verò fuerit hemitritæus, nova alia periodus incidit, antequam prior deferuerit; Sicque plures quam una periodus eodem nycthymero eveniunt. Quod uti in febribus ordina-

riis rarius est, ita in malignis, ex hac periodorum dupli-  
catione semiterianis dictis, fieri docent observationes  
practicæ.

## THESIS XXXVII.

**P**Erodus febrilis est vel typica vel erratica.

Typus est ordo accessionum periodicarum, redeun-  
tium certo tempore. Quæ periodus igitur ordinem quen-  
dam quò ad incidentes exacerbationes servat, dicitur ty-  
pica: quæ nullum habet, seu cuius exacerbatio tam vagè  
& irregulariter accidit, ut ab exercitato & attentissimo me-  
dico prævideri non possit, erratica sive vaga audit.

Febres ordinariæ & benignæ periodos habent typicas;  
periodi erraticæ utplurimùm cadunt in malignas.

## THESIS XXXVIII.

**T**Ypus febrilis triplex est: status sive fixus, præ-  
vertens & tardans.

Quando initium exacerbationis periodicæ in idem tem-  
pus constanter incidit, periodus fixa sive stata dicitur:  
quando citius citiusque semper ingruit, vocatur prævertens,  
sive anticipans: denique dum seriùs seriùsque advenit, tar-  
dans sive postponens appellatur.

## THESIS XXXIX.

**F**EBRES acutæ non malignæ ordinariè in suis perio-  
dis a prima invasione ad vigorem usque typum  
prævertentem exhibere solent, tardantem verò de-  
inde a vigore per declinationem usque ad finem.

Postea

Postea dicetur, acutas febres esse, quae citè & cum periculo decurrunt: innuant ergò vires vitæ valde actuosas ad subigendum vel expellendum noxiū, unde gravia symptomata nasci necesse est. Inde fit, ut exacerbationes harum febrium, utpote effectus actuosæ naturæ, quamdiu noxiū nondum subactum copiosius adhuc inhæret corpori, id est ante vigorem febris, citius citiusque successivè ingruant, veluti testes moliminiū, queis natura residuam a priori periodo materiam peccantem magis magisque mobilem & acrem redditam, quamprimum rursus accumulari & irritare incipit, iterum aggreditur: donec, cocto per repetitas periodos, vel expulso per crises vel perfectas aut imperfetas alieno, incipiatur deesse copiosior stimulus jam debilius tardiusque irritans vires vitæ sensim quoque debilitas & minus nunc actuosas: unde pericodice exacerbationes seriūs redeunt, siuntque tandem postponentes. Has præversiones & postpositiones periodorum vel ipsi adstantes distinguere nōrunt, cùm medico sæpissimè indicent, aestum hodie citius advenisse quam heri &c.

Hæc, & quæ porrò de præversionibus dicentur, in febribus ordinariis tantum locum habent, ubi nullus fomes malignus circa vitiata viscera latet: in malignis hic ordo non obtinet, quippe in quibus vitæ vires debiliores & quasi oppressæ hasce præversiones efficere non possunt.

## THESIS XL.

**E**T si varia sint harum præversionum spatia, habent tamen inter se ordinem quandam viribus vitæ & stimulo materiae peccantis proportionatum.

Quò actuosior est motrix illa vis, quæ febrium periodos moderatur, & quò copiosior turgidiorque est materia peccans, eo majoribus spatiis prævertet una periodus alte-

ram, & vice versa. Hæc autem spatia certis quidem horis determinari, nec nisi circiter notari possunt; cum nec dies nec anni paribus numeris absolvantur & operantis naturæ vis temporis civilis mensurâ circumscribi non possit. Hanc tamen servant inter se æqualitatem & ordinem, ut quod majori intervallo 2da periodus primam antevertit, eodem magiori 2da tertiae anteponat, aucto ferè qualibet periodo præversionum spatio per progressionem quandam, donec sensim per has anticipationes periodus idem ferè tempus iterum attingat, in quod prima exacerbatio inciderat.

## THESIS XLI.

**Q**UOD magis prævertunt periodi, eodem diutiū quoque durant, ita, ut vix notabile intervallum appareat inter remissionem prioris & subsequam exacerbationem posterioris periodi.

Quod cito redit exacerbatio, eodem plus temporis præcedenti remissioni adimit, quæ propterea minor tandem minorque fiet, ita, ut vix ullâ amplius apparente remissione febris putetur esse continua simplex sive continens. Neque propterea quod prius ingruit exacerbatio, eodem citius quoque cessabit: nox enim alit & protrahit exacerbationem, matutinum tempus remissioni favet: quod nunc magis ad matutinum tempus exacerbatio per præversiones incidit, eodem diuturnior erit periodus, vel ex eo etiam capite, quod, sicuti præversio citiora naturæ conamina materiaeque peccantis præcociorem stimulum indicat, ita quoque turgentior indies hæc materia, ut ex crescentibus symptomatibus patet, luctam hanc periodicam semper diuturniorem efficere debeat.

## THESIS

\* ) o ( \*

## THESIS XLII.

**Q**UÒ majoribus spatiis periodi se mutuò prævertunt, eò citius febris ad vigorem pervenit, eò proinde acutior est, & vice versa.

Quò magis prævertunt periodi, eò citius idem attin-gunt tempus, in quod prima febris exacerbatio inciderat. Hoc autem tempus per antepositiones affsecuta febris non potest a vigore procul abesse, cùm exacerbatio altera alteri facta propior, remissio verò brevior minùsque notabilior symptomatum maximam, quæ in ea febre esse potest, ve-hementiam producere debeat. In hoc autem symptomatum sensim auctorum summo gradu vigorem morbi confi-stere, palam est.

## THESIS XLIII.

**T**Ypus status five fixus accessionum periodicarum continuis longis & chronicis, itēmque aliquibus intermittentibus proprius est.

Sicuti typus prævertens tantùm in acutis ordinariis observatur, ità fixus ad chronicas tantùm pertinet, de quibus posteà. Si itaque exacerbationes acutarum, antea præ-vertentes, circa vigorem vel post illum fixæ reddantur, metus est, ne acuta mutetur in chronicam lentam: & vice versa si fixæ periodi chronicarum mobiles fiant, tum aut acuti quiddam illis complicatur, aut erraticæ, ut circa mortem, malignæve evadunt.

## THESIS

## THESIS XLIV.

**I**Taque ex typo periodorum attentè observato de febrium acutie, indole, statu & prædictione criseos utilia non pauca intelliguntur.

Quæ febris periodos habet tribus quatuórvæ horis præponentes, citius ad vigorem perveniet, eritque æstuioñ & acutior aliâ febre, cujus periodi tantum unâ duabusve horis prævertunt.

In vigorem febris initium bonæ criseos vel mortis incidere solet: igitur ex cognito per antepositiones vigore tempus bonæ criseos vel mortis inter bona vel mala utriusque signa prædicti potest.

Si exacerbationes irregulariter & sine ordine sive erraticè accidunt, suspicio est, febrem vel malignam, vel præposterâ medicatione maloꝝ regimine turbatam esse.

Si fixæ sint aut demum fiant, vid. Thesis XLIII.

## THESIS XLV.

**O**Mnes continuæ febres durationis intuitu sunt vel acutæ, vel chronicæ.

*Acuta* erit continua febris, si citò & cum periculo decurrit; sive quæ citò ad vigorem pervenit inter multa vehementia graviaque symptomata, quibus periculum vitæ continetur: vulgò dicuntur *bitzige Fieber*.

*Chronica* erit, quæ lente sua stadia sive tempora particularia percurrit, sive periculum vitæ conjunctum sit, sive non: *Zehr-Fieber*.

Ergò quò brevior febris inter gravia symptomata, eò periculosior erit: non tamen vice versa, quò periculosior, eò brevior

brevior erit. Malignæ sunt periculosissimæ, neque tamen brevissimæ.

## THESES XLVI.

**A**CUTÆ subdividuntur in acutissimas, peracutas, acutas simpliciter, & acutas ex accidentia.

*Acutissimæ* dicuntur, quæ septimanam plūs minūs durant; *peracutæ*, quæ duas hebbdomades; *acutæ simpliciter*, quæ tres septimanæ; *acutæ ex accidentia*, quæ finem mensis attingunt.

Hæc sunt acutarum generalia circiter tempora, quibus durare solent: interdum horā vel die citius tardiusve finiuntur, ut rectè dixerit HIPPOCRAT., nullam crisiū descriptam horam esse.


Ex antè memoratis præversionibus ab attento & exercitato medico prænoscī quodammodo potest, quot dierum vel septimanarum febris futura sit.

## THESES XLVII.

**A**CUTISSIMÆ febres uti & febres ex accidentia non tam frequentes sunt nostro cœlo, quam peracutæ & acutæ simpliciter.

Non raræ quidem sunt observationes morientium ex febribus 4to, 6to, 8vo die, ita, ut ejusmodi febres acutissimæ dici possent: sed non raro quoque error committitur, præcipuè in malignis, circa computandum initium febris, quod vulgo a decubitu ægroti in lectum, sed perperam peti solet, dum æger jam diu antè febre laboravit, eaque proinde non acutissima fuit.

Nec minūs raræ sunt observationes febrentium per quatuor septimanas & ultrà, quæ protractio febri appellationem



tionem dedit acutæ ex accidentia: verùm probè advertendum est, nisì ad multa HIPPOCRATIS loca cœcutire & impingere velimus, ne plures sibi post imperfectas crises succedentes febres pro unius decursu numeremus. Quam pluralitatem excipientium sese febrium toties merito suspiccamur, quoties circa tempus imperfectæ criseos algor quidam percipitur, initium novæ febris denotans. Ad hanc normam intelligendus est HIPPocrates, dum crises vel centesimo vicefimo die factas esse pluribus locis afferit. Exemplo variolarum, aliarūmq[ue] febrium exanthematicarum constare potest, sub decursu unius morbi plures febres sibi mutuò succedere posse.

## THESES XLVIII.

**T**empora particularia febrium continentur initio, incremento, statu sive vigore & declinatione.

*Initium* febris acutæ computatur a percepto primùm sensu frigoris sine externa causa, non a decubitu ægroti (a).

Hoc frigus jam ad modum rigoris majori vehementiâ accedit, uti in febribus inflammatoriis & æstuosioribus, nunc ad modum horripilationis, uti in febribus mitioribus, & malignis, potissimum exanthematicis.

Frigus quòd vehementius est, eò gravior æstus subsequi solet, & vicissim quòd minor est algor, eò lenior incalescens succedit. Si secùs evenit, justa suspicio febris malignæ est.

Horrores initio febris accidentes, si inter calorem subsequuntur & per primos dies aliquando repertunt, tum malignitatis inter alia signa præsiguum præbent, tum novam

(a) Vid. v. SWIETEN in Aph. 590.

vam exacerbationem fieri saltem significant: si circa vigorem accident, vid. Thesin XLVII.

*Incrementum* est illud stadium febris, quo symptomata post initium sensim augentur, cognoscendum ex prævertentibus exacerbationibus, dictoque symptomatum augmento. *Incrementa*, ait HIPPOCR. (*a*) manifesta sunt ex morborum circuitibus, ex quibus etiam iudicationes se manifestant: itemque ex lis, quæ per circuitus fiunt, exacerbationibus, si celerius accedant, aut non; si diutius durent, aut non; si majores fiant, vel non. Ubi exacerbatio in horas antemeridianas inciderit, recte conjicimus, febrim in incremento propiorémque vigori esse; nisi hoc initium febris fuerit, aut intercalarem exacerbationem esse appareat ex nova periodo circa vesperam ingruente.


*Vigor* sive *status* est illud decursus febrilis tempus, quo symptomatum vis successivè magis magisque aqucta quasi perfat, nec augetur amplius, nec minui incipit. Dignoscitur remissionibus periodorum brevissimis, exacerbationibus autem inter aqucta symptomata longissimis & vehementissimis pro genio cujusque febris. *Cum exacerbationes statim acceperint & similiter per omnia consequenter* (id est sine vix notabili amplius intervallo) contigerint, concomitantibus symptomatibus neque detractis neque additis, tunc in vi-  
gore morbus esse dicatur (*b*).

*Declinatio* sive *decrementum* dicitur illud febris stadium, quo vel facta per crisis perfectam plenariâ morbi solutione æger paulatim vires resumit, vel inter crises imperfectas successivè contingentes minuantur sensim symptomata.

Quod

(*a*) Epid. Libr. 2.

(*b*) Aëtus Libr. V. Cap. 17.



Quò febris acutior & ardentior est, eò minora sunt spatia horum temporum particularium, & vice versâ: hinc certo dierum numero mensurari non possunt.

## THESIS XLIX.

**F**EBRES ACUTÆ PORRÒ DIVIDUNTUR IN ORDINARIAS & MALIGNAS.

Anomalæ quidem apparentiùs opponuntur ordinariis, quàm malignæ, quæ benignis obverti solent. Verùm anomalæ ut plurimùm quoque malignæ sunt & nomine ordinariarum híc omnes benignæ intelliguntur.

Hæc divisio utilissima est ad praxin, cùm separatas & proprias harum febrium, diversissimarum quidem, difficeret tamen distinguendarum, præsertim inter initia, ideas suppeditet.

## THESIS L.

**F**EBRES ORDINARIÆ SUNT, QUÆ INTER CONSUETA & NON ALIENA SYMPTOMATA PROPRIO CUIQUE MODO DECURRUNT, ITA, UT EA TAM INTER SE SE, QUÀM CUM MORBI TEMPORE CONSENTIANT.

Quænam sint consueta, ordinaria & propria cuilibet febri symptomata, ex ulteriori earum divisione patebit.

Quælibet febris ordinaria sicut habet sua varia tempora initii &c. sic quoque varia pro diversis istis temporibus habet symptomata, ordine quodam fere in sequentia. Initio potissimum actiones vitales affici ex pulsu & calore mutatis percipimus: deinde simul actiones naturales successivè turbari ex nausea, appetitu dejecto, vomitu, urina &c. videmus: donec tandem hisce symptomatibus cirga vigorem

rem

rem lœsiones actionum animalium adjungantur, ut debilitas, tremores, deliria, spasmi &c. Si hæc phœnomena suis quæque temporibus appareant, recte judicamus febrem, cæteris paribus ordinariam esse.

Sed hæc symptomata inter se quoque consentire debent: calori miti sitis parva, multa sitis æstui magno, levibus aliis alia levia respondent. Si verò, ut ex contrariais contraria magis elucent, calor ad contactum mitis sit, lingua tamen sicca & aspera aut multa sitis: si calor magnus, sitis verò exigua & urina pallida: si æger ad conspectum leviter habeat, & tamen valde debilis sit aut deliret, hæc symptomata non conveniunt inter se.

## THESIS LI.

FEbres ordinariae triplices esse observantur, scilicet ordinariae simplices sive leviores, inflammatoriae, exanthematicæ.

Ordinariae sive *benignæ simplices* sunt, quæ inter symptomata, satè quidem interdum timenda præsertim circa vigorem, sed non aliena raro ultra 14um diem, saepè minus, durant, absque notabili visceris cuiusdam inflammatione & sine efflorescentiis cutaneis: atque idcirco nullo speciali nomine, ut aliae inflammatoriae & exanthematicæ insignitæ sunt. Huc pertinent febres Germanis dictæ biliosæ & catarrhales non malignæ.

Non magna corporis impuritas, causæ prægressæ manifestæ ex ira, ingluvie, transpiratione impedita, potu frigido &c. eæque non vehementes nec diu nimis applicatae, absentia maligni contagii & labis cuiusdam in visceribus hypochondriorum, atque symptomata initio mitiora & ordinaria febrem simplicem & leviorum fore præsagiunt:

præsens dignoscitur in suo decursu absentiâ signorum inflammationis, exanthematum & malignitatis.

Possunt tamen his febribus ex curatione præpostera malóve regimine inflammations vel exanthemata supervenire, si nimirum venæsectio, primarúmque viarum evacuatio negligatur, aut regimen nimis calefaciens adhibetur, de quibus in symptomaticis.

## THESIS LII.

**I**Nflammatoriæ dicuntur, quæ propter notabilem alicujus visceris inflammationem ardentes sunt & suis gaudent nominibus ut *pleuritis*, *peripneumonia*, *phrenitis*, *gastritis*, *nephritis*, *hepatitis* &c.

Quando hæ febres inflammatoriæ sunt æstuosiores, dolorificæ & ordinariis sibiique propriis symptomatibus stipatae, ordinariæ dicuntur: accidit autem non raro, viscereum sic dictorum parenchymaticorum, præsertim pulmonis, hepatis, lienis, renum inflammations obscuras, non admodum dolentes, nec ad contactum, ut ait HIPPONCRATES, adurentes esse; tuncque non vacant timore malignitatis, præsertim si aliena alia symptomata coniuncta sint.

Notatu proinde dignum est, alias inflammations posse dici acutas, quarum signa manifesta & vehementia sunt, uti dolor acutus præsertim in partibus membranaceis, pleurâ, ventriculo, intestinis, meningibus &c.; pulsus plenus, tensus, durus; calor urens; siccitas magna; sitis inexplebilis; inquietudo præter alia evidenter signa lœsuarum actionum a parte inflammatæ pendentium, veluti respiratio difficultis & tussis in pleuritide; vomitus sincerus ingestorum in gastrite, hepatite, retentio urinæ in inflammatione vesicæ; deliria ferocia in phrenitide &c. alias verò lentas

lentas & gliscentes, quarum signa obscuriora minùsque vehementia non exercitato nec satis attento medico facile imponunt, ut̄ dolor minùs acutus in inflammatione partium minùs membranacearum, hepatis, lienis &c. pulsus non adeò plenus, durùsve, siccitas sitisque non adeò magna, calor urente minor aut tantùm mordax. Hasce inflammations inter ejusmodi signa erysipelaceas vocant, ex humorum acrimonia & tenuitate potius, quām inflammatoriā sanguinis densitate oriundas.

### THESIS LIII.

**E**Xanthematicæ febres dicuntur, quibus per decursum exanthemata sive efflorescentiæ cutaneæ per modum sive criseos, sive symptomatis superveniunt.

*Exanthematum* nomine veniunt papulæ, pustulæ maculævè cutaneæ variæ, rubræ, albæ, purpureæ, lividæ, nigræ, latæ, parvæ, læves, asperæ, vel protuberantes ultra superficiem cutis, vel non, totidem veluti inflammatiunculæ in varios illos colores sensim abeuntes, internis etiam partibus insidentes.

Horum exanthematum alia in suppurationem abeunt, ut̄ variolosa, miliaria: alia sine suppuratione paulatim disparent cum desquamatione cutis, ut̄ purpuracea, scarlatina, urticata, morbillosa, petechialia sive puncticulata rubra & boni moris: petechiæ enim purpureæ, lividæ vel nigræ huc non pertinent, utpote semper malignæ febris comites.

Alia porrò sunt essentialia sive non separabilia ab ea febre, quam afficiunt, ut̄ variolæ, morbilli, scarlatina & urticata exanthemata: alia accidentalia, quæ variis febribus

bus præcipue malignis post ineptam regiminis vel curatio-  
nis methodum symptomatico modo possunt accidere, uti  
miliaria, petechalia, purpuracea. In hisce febris ex-  
anthematicis manifestius apparet id, quod suprà dictum  
fuit de serie plurium febrium sese excipientium post imper-  
fectas crises: postquam enim maculæ pustulæ eru-  
runt, prior febris paululum quiescere, ægérque melius  
habere solet: deinde verò alia succedit usque ad desquama-  
tionem vel factam suppurationem durans, quam sæpe  
alia porrò præcipue lenta tabida aut etiam non raro acuta  
excipit, exemplo variolarum & morbillorum.

Sicuti inflammatoriæ ardentes ex rigore plerūmque  
initium habere solent, ita exanthematicæ tantum cum hor-  
roribus adorintur, qui ex dorso si inceperint & veluti  
diffundantur, periculo malignitatis non carent.

## THESIS LIV.

**M**alignæ febres dicuntur illæ, quarum sympto-  
mata insolentiora sunt, quæm in ordinariis ob-  
servantur, neque inter se mutuò, nec cum tempore  
morbi consentiunt (a).

Harum fundamentum diagnosticon ETTMÜLLERUS de  
*febri malignâ* in eo ponit, quod habeant symptoma majora  
seu graviora aut solenniora, quæm possunt ex causa, ordinario  
modo constituta, oriri, adeoque qualia alias in tali morbo adesse  
non solent.

*Malignum* juxta ETTMÜLLERUM nil aliud est, quæm nu-  
dum nomen designans causæ occasionalis sive materialis statum &  
conditionem, quia nempe hæc degenerat a sua natura & mutata  
fuit,

(a) CASTELL Lexic. Med. verbo: benignus.

fuit, respectu corporis universi patientis in pejus. Maligna febris ita dicitur propter similitudinem ab hominibus malignis, qui sub specie recti decipiunt: nam toles morbi apparent boni, revera autem sunt mali, & ex insidiis quasi nocent.

Hinc bene definiuntur cum GORRHÆO (*a*) febres potestate graves, specie leves, & quæ certa criseos tempora non habent. Fallacia enim sunt & levia ad conspectum earum initia, paulò tamen post affuturis gravissimis symptomatis, quæ apud ETTMÜLL. graphicè descripta legi possunt.

*Humor morbosus, vehementia, multa vel aliena symptomata inferens aut latenter magnum vitæ periculum producens, dicitur malignus a GORTERO (*b*). potissima sunt hæc:*

*1<sup>o</sup>. Virium singularis & subitanea ab initio prostratio sine causa manifesta, id est, quæ neque ex prægressis evacuationibus aut defatigationibus, aliisque erroribus in usu sex rerum non naturalium, neque ex diuturnitate morbi, utpote jam incipientis, oriri potuit; sicutque causis prægressis & temporis morbi non responderet.*

*2<sup>o</sup>. Horrores saepe recurrentes & ex dorso incipientes, cum dorsi & lumborum dolore sine rheumatismi vel hæmorrhoidum vel mensium instantium aut calculi renum signis. Interdum quidem cum rigore febris incipit, sed non subsequitur aestus rigori proportionatus.*

*3<sup>o</sup>. Insolita ægri tristitia, pusillanimitas, sui displacentia, morositas, anxietas, inquietudo, nausea.*

*4<sup>o</sup>. Vagi dolores; partiales, fugitivi & leves sudores circa frontem, collum, præcordia, reliquo corpore sicco.*

*5<sup>o</sup>. Facies decolor, livida, fusca, aut alio modo cachectica: oculi levibus icteri notis flavescentes.*

*6<sup>o</sup>. De-*

{*a*} Definit. Med.

{*b*} Prax. Med. §. 129.

6tō. Decubitus solito impudentior aut supinus: mentis habitus solito trucior, mœstior, hilarior, verbo alienior ab illo, qui fuit in sanitate.

7mō. Lingua sordida, sicca, licet vel æger affatim bibat, vel calor mitis sit.

8vō. Febris ad conspectum levis ex calore, urina, pulsū parūm mutatis a naturali: respiratione interim existente diffcili, suspiriosā, anxiā & gliscientibus levibus, fugitivis deliriis.

9nō. Periodi erraticæ aut hemitritææ vel tritææ &c. verbo omnia unquam observanda symptomata, si cum reliquis febris symptomatibus aut cum illius tempore non consentiant, malignitatis signa præbent.

Multos offendit maligni vocabulum, idque ex medicina proscribi cupiunt: sed quid per illud intelligamus, suprà dictum fuit.

Veterum potissimi febres malignas intelligebant nomine paraphrenitidum, sic dictarum propter deliria ad conspectum leviora, minus furiosa, sed potius taciturna, quæque, ut HIPPOCRATES ait, melancholico modo fiant; ad distinctionem phrenitidum verarum, in quibus ea manifestiora magisque furiosa sunt, orta idiopathicè ex affecto encephalo, cum in paraphrenitide consensualia sint ex causis haerentibus circa viscera infimi ventris, sive circa hypochondria: unde non raro febres malignas, præsertim circa initium, symptomata hypochondriaca comitantur & quasi tegunt, ut sub iisdem aliquamdiu lateant.

Hæ febres certa criseos tempora non habent tum propter typum periodorum vagum jam præ- jam postponentem, tum propter crises raro perfectiores per sudorem & urinam, sed frequentissimè imperfectas non exhaustentes morbum, sed factâ metastasi aliam rursus atque aliam febrem producentes.

Sedem

Sedem causarum, ad febres malignas prædisponentium, potissimum esse in visceribus hypochondriorum, præcipue verò circa hepar, docet autopsia anatomica, quæ in caderibus, malignâ febre peremtorum, semper in hepate visceribûsque vicinis inflammationis prægressæ putrilaginique sæpe profundioris notas & bilem corruptissimam, subviridem, atram, lividam in vesicula fellea pariter gangrenosâ exhibit.

Obstructio & maceratio horum viscerum, bilis varia corruptela, sanguinis fatigentis aliorûmque humorum eminentior acrimonia, malum sic dictum hystericum & hypochondriacum præcipuæ sunt causæ prædisponentes ad febres malignas.

Hæc prædispositio non obscurè elucet ex facie decolor, cacheœtica, ex albo flavescente aut atrabilaria, præfertim circa palpebras, oculis subicteritiis, in corporibus minùs repletis: in obesioribus autem ex facie carnosa quidem, sed rubore inæquali neque naturali, sed quasi punctato aut striato, acrimoniæ & hepaticæ læsionis non dubio indice, notatâ: utrobique verò ex frequentiore erysipelate externo, & symptomatibus hypochondriacis.

Nasci successivè potest ex prægressis frequentibus & diuturnis erroribus in cibo & potu insalubribus, in quiete nimia, vigiliis & lucubrationibus intensioribus, in reliquo denique regimine vitæ, præfertim verò ex ira, mœrore, metu, aliisque animi pathematibus, quæ amplissimo tædii ambitu continentur.

Nata verò facit, ut, quæcunque febris continua sive exanthematica, sive inflammatoria, sive simplex in tale corpus incidit, facilè maligna fiat ex latente jam hoc fomite maligno, dum in alio corpore non itâ prædisposito illa ordinaria erit. Hinc pleuritis, dysenteria, variolæ, hepatitis,

aliæque febres putridæ sporadicè, id est in aliquibus ægrotis, malignæ possunt esse, dum in aliis benignæ sunt.

Ipsa verò malignitatis ratio formalis sive essentia, de qua variæ legi possunt opiniones apud ETTMÜLL., videtur in ea sanguinis & bilis vitiata miscela consistere, ut facillimè putredinem concipient, & plerumque sine manifestis nec satè evidentibus inflammationis prægressæ notis subitò in gangrænam sphacelumque viscerum abeant (a). Hunc effectum docet cadaverum inspeçtio; ipsa verò symptomata febrium malignarum modum latenter adrepentis gangrænam declarant, eadem ferè ratione, sicut in inflammationibus partium externalium febrem anteà satis magnam, quam primum gangræna adrepit, successivè parvam inter prostratas ægri vires fieri videmus.

## THESIS LV.

**O**mnes malignæ febres in 4. classes dividi possunt: 1<sup>st</sup> in malignas solitarias fine contagio & sæpe fine exanthematibus. 2<sup>nd</sup> in malignas cum contagio vel exanthematibus, vel cum utrisque simul. 3<sup>rd</sup> in malignas pestilentes. 4<sup>th</sup> in veram pestilentiam.

Ad *malignas solitarias* pertinent illæ, quæ sine prægresso contagio ex privatis & quasi domesticis corporum causis suprà memoratis oriuntur, & plerumque aut sporadicè afficiunt, aut alias acutas vel negligentiùs vel impetuosiùs habitas consequuntur, quo casu secundariæ quoque dicuntur.

Interdum exanthemata quidem adsciscunt; sed sæpe quoque sine illis terminantur. Sicut enim non omnis exanthematica

(a) CASTELI Lexic. Med. verbo: malignitas.

thematica febris maligna est; ita nec omnis maligna semper exanthematibus stipatur: ad ea tamen proclivis est.

Ad *malignas cum contagio vel exanthematibus vel cum utrifice spectant illæ*, quæ dum ex communi causa haerente in ære sive ex contagio oriuntur, epidemicè plerumque graſſantur, interdum etiam sine exanthematibus.


Hæ contagiosæ cum celeriori virium prostratione invadunt & graviores universim sunt, quam solitariae, quarum initia lentè fiunt cum diuturniori languore & virium prostratione inter morosa pathemata suique displicentiam &c.

Ad *pestilentes* referuntur prædictæ malignæ cum contagio, quando magnam simul stragem efficiunt, plurimosque necant pestis instar. Tales sunt febres catarrhales malignæ, petechizantes, miliaries, variolæ malignæ, morbilli maligni, febres caſtrenſes &c.

*Pestilentia vera seu pestis* est summus febrium malignarum gradus cum *bubonibus*, id est, *glandularum in partibus externis inflammatorio dolore*, & *carbonibus seu anthracibus*, id est, *furunculis gangrenosis in locis potissimum musculosis*.

Etsi igitur ex febre quadam maligna epidemicè graſſante plurimi moriantur, ut proinde ea pestilens dici posſit; non tamen erit idcirco vera pestis, niſi duas illas notas caræteristicas bubonum & carbonum exhibeat. Has si habet quædam maligna febris, pestis est: etiamsi alia coniuncta exanthemata aliam malignam v. g. petechiam aut miliarem præ ſe ferant: quo casu ipſa pestis febri malignæ complicata est, uti non raro fieri ſoleret.

## THESIS



## THESIS LVI.

**C**Hronicæ febres (*a*) dicuntur illæ continuæ, quæ ultra mensem unum plurésque, imò ad annos interdum variâ diuturnitate protrahuntur.

Quæcunque febris ultra mensem sine notabili declinazione durat, chronicæ vocatur. Etiamsi enim febris diutiùs, quam per mensem ægrorum affligat, si tamen vigor morbi ante finem mensis transeat, febrisque hoc tempore sensim declinare incipiat, potius ad acutas ex decidentia, quam ad chronicas pertinet, ut ut deinde tempus declinationis in initium mensis sequentis incidat.

## THESIS LVII.

**H**Æ commodè statui possunt triplices : hec̄tica, phthisica, cachectica.

Videntur & aliæ febres continuæ, præsertim acutæ ex decidentia dictæ, ad chronicas referri posse, cùm ultra mensem haud raris exemplis durare soleant: sed quid de hac earum protractione sentiendum sit, *Thef. XLVII.* dictum fuit.

## THESIS LVIII.

**H**ec̄tica febris est continua longa cum lenta consumptione corporis absque ulcere sive in- sive externo.

*Hecc̄tica* græcè dicitur ab habitu, quod corpori propter longiorem inhærentiam habitualis jam redditæ sit. Quā quidem

(*a*) *Thef. XLII.*

quidem etymologiā cum aliis chronicis covenit, discrepat  
verò partim absentiā ulceris, partim aliis notis characteristi-  
cīs postea afferendis.

Cognoscitur imprimis caloris post pastum exacerbatione in extremis partibus: causas antecedentes habet scirrhos & obstruktiones viscerum nondum exulceratas, colluviem verminosam, notabilem humorum acrimoniam lentè contractam, aut evacuationes nimias bonorum humorum per effusiones sanguinis, diarrhoeas, aut nimiam venerem.

## THESIS LIX.

**P**Hthisica sive tabida febris est continua longa cum contabescientia corporis ex ulcere vel in - vel externo, vel clauso vel aperto.

Convenit omnino cum hectica quod ad caloris exacerbationem post pastum & tabescientiam corporis, nisi quod haec in tabida febre paulo celerior sit. Differt autem characteristicē per signa puris vel alicubi in corpore latitantis, ut in obstruktionibus viscerum & scirrhis glandularum mesenterii, mammarum, uteri, meditulliis suis lentes suppurationes concipientium & in carcinomata abeuntium: vel ex aliqua cavitate emissi formā sputi vel fluoris albi, aut cum urina aut ex manifesto alio ulcere; cuius magna pars vasis resorpta hanc febrem diutissimè aliquando sustentat. Si ab ulcere pulmonum nata fuit, sigillatim pulmonalis audit.

Ex quibus patet, facilem interdum esse transitum hecticā in phthisicam, scirrhis & obstruktionibus incipientibus exulcerari.

## THESIS

## THESIS LX.

**C**acheœtica febris est continua chronica cum habitu corporis subtumido, lurido, icterode, aliisve modis decolore, pedumque œdematisbus.

Cachexia est malus corporis habitus quod ad colorem, mollitiem, aspredinem, aliasque qualitates sensibiles a statu sano alienas. Haec quamvis heœticæ phthisicæque febri quoque communis sit, cacheœtica tamen illa strictè vocatur, quæ notas suprà positas exhibet.

Huc pertinet imprimis chlorosis, seu pallida febris virginum; Febres itidem longæ mulierum, virorum, puerorum cum malo ejusmodi habitu: five ex virtio mensium uterique albo fluore, five ex nimia solidorum laxitate & fluidorum inertia undecunque demum contracta originem habuerint, postquam videlicet talis paulatim metamorphosis in viscidis hisce humoribus succrevit, ut febrem in ejusmodi corpore, quamvis frigido, efficere potuerint.

Quodsi præter intumescentiam, ut ferè solet, habitus corporis, præsertim faciei, luridus, aut icterodes fuerit, indicio esse poterit, hepar, lien aliudve viscus in hypochondriis chronicò quodam virtio simul laborare: quo casu hypochondriaca hystericaque symptomata conjuncta esse solent: id quod pariter de febre heœtica phthisicaque imò quibusunque aliis febribus notatu dignum & utile in praxi est.

Non raro quidem phthisicis heœticisque febribus, imprimis ubi confirmatae fuerint, etiam œdemata pedum & inflatio faciei supervenire solent: neque tamen propterea confundendæ sunt cum cacheœtica, utpote cuius caracter ex causis habituque prægressis ulcerumque absentia non obscurè elucescit.

## THESIS

## THESIS LXI.

**P**Eriodi continuarum chronicarum sunt, uti in acutis, interdum quotidianæ, interdum tritæ & hemitritæ: typus verò periodorum ordinariò fixus sive status est.

Pro singulari varietate specificæ illius causæ, quæ febrium periodos moderatur, de qua posteà, pro varia complicatione aliarum concausarum sive lœsionum in variis visceribus, humorūmque peccantium conjunctorum diversa degeneratione & indole variæ erunt hæ febriles periodi tam in acutis quam chronicis: ita, ut vel quâvis die unica exacerbatio præcipue circa vesperam ingruat, vel alternis diebus tantum una, vel denique singulis aut alternis diebus quidem duæ, sed sibi dissimiles quo ad modum invadendi & decurrenti pro illa die, quam ambæ incident, similes autem futuræ aliis exacerbationibus, quæ posteà vel singulis vel alternis diebus rursus incident (a).


Typum autem periodorum in chronicis ordinariò fixum esse solere, non verò prævertentem aut tardantem, nisi illis alia acuta symptomatico modo interseratur, ad *Thes. XL.* dictum fuit.

## THESIS LXII.

**A**ltera summa classis febrium sunt intermittentes, *pyreta dialeira HIPPOCR.*, quarum definitio vid. *Thes. XXV.*

Distin-

(a) Vid. dicta de *Amphymerina*, *Tritæ &c.* *Thes. XXXI.*



Distinguuntur *imò* ex diuturnitate intervalli, quod inter singulos earum paroxysmos intercedit, in quotidianas, tertianas, quartanas &c.

### THESIS LXIII.

**Q**Uotidiana intermittens est, quæ paroxysmos fini-  
gulis diebus redeuntes, & inter hos tempus  
aliquid febre vacuum habet.

Multi expungunt quotidianas ex numero intermitte-  
tium, propterea, quòd putent, eas commodè ad tertianas  
duplices referri posse, cùm facile in continuas mutari  
soleant.

Attamen eas revera observari, præsertim in junioribus  
& nullo viscerum notabili vitio laborantibus, docent atten-  
tiores practici. A tertiana verò duplici certis notis posteà  
memorandis distinguntur.

### THESIS LXIV.

**T**ertiana intermittens est, cuius paroxysmi alternis  
diebus, seu tertio quoque die repetunt, inter-  
cedente plenariâ apyrexia.

### THESIS LXV.

**Q**uartana intermittens est, quæ intra quatuor  
dies, factâ semper computatione ab initio prio-  
ris paroxysmi, unam tantum accessionem habet, in-  
termedia apyrexia.

Non

Non desunt practici, qui cum HIPPOCRATE quintanas, septanas, nonanas imò annuas se observâsse fidem faciunt (a). Sed cùm hæ rariores sint, enumeratis immorari satis erit.

## THESIS XLVI.

*2dō R* Atione periodorum distinguuntur in simplices, duplices, triplices &c.


Sic *quotidiana duplex* erit, quæ duos paroxysmos eādem die recipit. *Tertiana duplex* singulis diebus paroxysmum habet: quo casu a quibusdam *quotidiana ex tertiana* dicitur. *Tertiana triplex* erit, si unā die unum paroxysmum habet, alterā duos. *Quartana duplex* aut primo aut secundo vacuo die iterum paroxysmum habet, unūmque tantūm diem vacuum. *Quartana triplex* singulis diebus paroxysmum excitat, nec vacuum ullum diem relinquit, ob quam multiplicationem paroxysmorum dici potest *quotidiana ex quartana*. Et sic porrò de reliquis.

## THESIS LXVII.

**H**Æ paroxysmorum multiplicationes sæpiissime febris veram indolem ità celant, ut non nisi attentissimâ illorum comparatione inter se dignosci possit.

Modus examinandi & comparandi multiplicatos ejusmodi paroxysmos in eo situs est, ut inquiramus, quinam eorum

(a) WERLHOFF. Obs. de Febr. p. 269.



eorum sibi & tempore accessionis sive typo & vehementia symptomatum sive decursu ipso consentiant. Sic competemus primarios primariis, intercalares verò intercalaribus typo & decursu similes esse. E. g. in tertiana duplicitate paroxysmi diei primæ, tertiae, quintæ &c. utpote primarii sibi respondebunt: intercalares vicissim ut secundus, quartus, sextus &c. sibi similes erunt, quæs notis tertiana duplex a quotidiana facilè distinguetur. Rursus quartana triplex tantum diversitatis in suis paroxysmis exhibebit, ut primæ diei periodus cum periodo quartæ diei, secundæ diei periodus cum illa quintæ diei respondeat, & sic de reliquis. Quando hæc relatio paroxysmorum multiplicatorum ad se invicem abest, meritò erratici aut illegitimi quid subesse suspicamur. Sed attendenda simul sunt ea, quæ de febribus continuis *Thef.* XXXIV. hanc in rem dicta fuere.

## THESIS LXVIII.

*3tiò* Distinguuntur ex ordine, quo paroxysmi redeunt, in typicas & erraticas (*a*).

Quod proprius intermittens ad indolem acutæ accedit, eò magis illius periodi prævertent, & vice versa.

Observationibus D. LANGRISH (*b*) patet, sanguinem quotidianâ intermitente laborantium densiorem & tenaciorem esse, quam tertianâ affectorum: horum sanguinem itidem spissiorem esse, quam quartaniorum. Proinde quotidiana & tertiana intermittens, cæteris partibus,

(*a*) *Thef.* XXXVII.

(*b*) *Theor. Mod. Cap. V.*

bus, propriūs accedunt ad īdolem acutarum, quām quartana, licet diverso inter se gradu. Id ipsum confirmat experientia, quā intermittentem quotidiam atque adeò tertianam ex curatione vel regimine calidore, aut ex aere humido frigidōque in siccum & aestuosiorem mutato in continuas non raro verti docemur. Igitur pro varia hac relatione variæ erunt paroxysmorum præverfiones in intermitente quotidiana & tertiana, eo ferè modo, uti de acutis dictum fuit.

Quartanæ etsi ex eodem capite frequenter periodos tardantes & saepē fixos, præsertim si rebelliores sint, habent; observantur tamen interdum suos paroxysmos anteponere his potissimum de causis, quod vel sanguis cæterique humores adhuc satīs mobiles neque nimis inertes aut fixi sint, vel aëris mutatio in melius fiat, vel regimen aut remedia calefacientia adhibeantur: quæ causæ pariter quarumvis aliarum periodorum febrilium, antepositiones promovere observantur.


## THESIS LXIX.

*4to* Distinguuntur ratione moris in ordinarias & malignas (a).

Graviora sunt observatorum ipsiusque experientiæ testimonia, quām ut dubitari posit de *malignis intermittentibus*. Sed hæ malignæ cùm plerumque simul soporosæ sint, de quibus egregie scripsit WERLHOFF (b), attendendum est, ne aliquo tempore tardior in illis pulsus, qui soporum <sup>maxima</sup>

(a) Thes. XLIX.

(b) Observat. de Febrīb.



maximam partem comitari solet, pro intermissione fallat; præsertim cùm earum exacerbationes leviores quò ad alia symptomata esse soleant, ac potissimum ex invalecente sopore & stupore dignosci debeant. Solent præterea hæ malignæ intermittentes plerumque post aliquot periodos in continuas manifestas abire.

## THESIS LXX.

*5to* **D**enique ex anni tempore distinguuntur in autumnales & vernales.

*Scire est, banc in genere esse vernalem, quæ a Februario in Augustum, & autumnalem, quæ ab Augusto in Februarium dominatur: distinctione necessariâ ob varios mores, symptomata, exitus, durationem, curationemque febris: quin una alias fugat (a).* Vernales sunt mitiores, breviores, curatûque faciliores autumnalibus, nisi vel contagium epidemicum, vel privata labes viscerum malignas faciat, aut veris tempestas nebulosior aut humidior, ægrotique pravum regimen solutionem prolonget. Autumnales curatu difficiliores sunt, & sœpe in hydropem, icterum, cachexiam, viscerum indurations, aliósque morbos abeunt.

## THESIS LXXI.

**R**atio & causa repetentium certo tempore periodorum in febribus intermittentibus æquè ac remittentibus multa torsit hucusque præstantissima ingenia; neque tamen sufficienter evolvi potuit.

Tam

(a) BOERHAV. Aph. 747.

Tam intricata est ætiologia febrilium periodorum, ut doctissimi medici non erubescant profiteri, se rationem re-deuntum certo tempore accessionum capere non posse; neque eam humani ingenii viribus unquam exhauiendam esse.

GORTER (*a*) arbitratur febris materiam, cùm viribus vitæ superata fuit, sed talis sit naturæ, ut simul semina relinquat certo tempore maturanda, febris intermittentis ideam præbere. Simili quoque modo naturam operari in planta annua, bienni, perenni & similibus, quarum totâ hyeme quædam silent, sed æstate novo ex semine progerminant; priusquam moriuntur, maturum iterum semen ferunt: aliae verò biennium insument, priusquam in se conficiunt semen, & dein extinguntur. Hæc & similia animadverti in plantis, nōsque contentos esse hæc videre in rebus naturalibus, quæ tamen nolumus admittere in morbis. Qui horum reddere valet causam, illi quoque difficile non fore, causam proximam periodorum in intermittentibus invenire.

ILLUSTR. VAN SWIETEN postquam acutissimo examine in hanc rem inquisiverat, concludit, febrium intermittentium distinctum & determinatum cavarerem in spiritibus nervosis, nervis, vel communi horum origine latere, illūnque irritari quidem posse a morbois collectis humoribus, ut fortiores & diuturniores faciat paroxysmos, & sopitum jam a similibus causis excitari posse; non tamen indigere semper collecto quodam fomite intermedio inter binos paroxysmos tempore, ut in actum deducatur, sed propriâ suâ vi paroxysmos renovare posse: simulque probabile videri, diebus intercalaribus adesse similem dispositionem, quæ ab aliis causis in actum deduci possit; & deinde illis causis quamvis abolitis, pariter pergere (*b*).

Dignis-

(*a*) Comp. Med. Tract. 52. Num. XII.

(*b*) Comm. in BOERH. Aph. 757.



Dignissima lectu sunt, quæ celeberr. WERLHOFF. (a) ingeniosissimè meditatus est de proportione & consensu materiæ febrilis aërisque elastici, qui illius, ut omnium in corpore humorum, partem constituit, cum aëre atmosphærico, ut causa hārum periodorum.

## THESIS LXXII.

**N**ON desunt indicia, ex quibus præsciri possit, utrū incipiens febris continua futura sit, an intermittens?

Hæc petuntur primò ex præsente constitutione epidemice grassantium febrium vel continuarum vel intermittentium.

Deinde ex particularibus symptomatibus incipientis febris: si enim prægresso frigore inter reliqua communia febrium symptomata gravitatis artuum, cardialgiæ, nauseæ, cephalalgiæ &c. sequatur æstus algiorum prægresso proportionatus, æstuique respondens fritis, hisque tandem minui incipientibus succedat sudor cum levamine dictorum symptomatum, intermissionis secuturæ satis firmum præfigium est; præsertim si finito paroxysmo urina rubri coloris sedimentum lateritium deponat.

Si verò æstus præcedenti frigori non respondet, aut novis horroribus identidem interruptur, neque sudor universalis intra primas 24. horas cum remissione symptomatum succedat, justa suspicio continuæ febris erit (b).

## THESIS

(a) Observ. de Febr. Sect. 6.

(b) Vid. CHATRON Introduc. de Febr. contin.

## THESIS LXXIII.

**C**ommutari in se invicem dicuntur febres, quando continua in aliam continuam aut in intermittentem mutatâ prorsus indole transit, & vice versâ.

Suprà dictum fuit ad *Thef. XLVII.* plures acutas sub specie unius decursûs febrilis post imperfectas crises sibi succedere posse.

Non raro continuæ ordinariae & leviores mutantur in exanthematicas, extortis calido regimine maculis purpureis &c.

Sæpe continuæ acutæ, præsertim inflammatoriæ, generato pure, mutantur in chronicas.

Frequentissima verò & maximæ considerationis commutatio est continuarum in intermittentes, & intermittentium in continuas.

## THESIS LXXIV.

**E**T si diversæ possint esse causæ hujus commutacionis, potissima tamen est ipsa mutatio aëris.

Non exiguum quidem momentum ad mutandas febres situm est tum in methodo curandi & regimine nimis aut calefaciente aut refrigerante: tum in ipsa temperie ægroti vel robusta & calida ad acutas prona, vel debili & frigida ad intermittentes & lentas disponente: tum in humorum varia metamorphosi per febrim successivè inducta, aut eorum in alia atque alia loca metastasi: denique in miasmate epidemico has præ aliis febres advehente, &, dum alteri constitutioni epidemicae succedit, aut in febres sporadicas incidit, eas commutante in febres alterius speciei:

potissima tamen hujus commutationis causa frequentissimè latet in ipsa mutatione aëris quò ad qualitates ejus manifestas & sensibiles.

Sic in comperto est, aërem humidum & frigidum favere intermittentibus, quæ propterea autumno & vere tam frequentes sunt: siccum & valde frigidum acutis inflammatoris: humidum & calidum verò putridis malignisque febribus. Mutatâ hâc aëris constitutione plerumque mutantur natæ sub ea febres in alias, secutæ aëris temperiei, & ægroti variæ dispositioni sive temperamento respondentes.

Si æger robustus fuerit, sanguinémque densum habuerit, febris ejus, quæ sub aëre humido frigidiusculo intermittens erat, mutato hoc aëre in siccum & simul valde frigidum aut calidum, vel sponte cessabit, vel abibit in acutam fæpe inflammatoriam, præsertim si regimen & media calefacientia simul adhibita fuerint (a).

E contrario si aér anteà siccus & calidus febres acutas inflammatorias, admissò incautiùs frigore facilè accerendas, adduxit, illo posteà mutato in nebulosum & frigidiusculum continuæ mutabuntur in intermittentes.

Quotiescumque verò aér prægressus calido-siccus aut humido-frigidus, prædictis febribus opportunus, in humidum & calidum fatiscit, disponit ad febres catarrhales putridas, lentas & malignas pro varia ubique dispositione corporum & applicatorum auxiliorum. Pulcherrima hanc in rem habet aphorismorum HIPPOCRATIS Sectio tertia.

Ob hanc aëris diversam constitutionem febres, sive vernales sive autumnales fuerint, citius vel seriùs incipiunt, & vicissim citius vel seriùs desinunt, ità, ut autumnales intermittentes ob aërem humido frigidiusculum interdum

Junio

(a) HUXHAM Dissert. de pleurit. & peripneum.

Junio & Julio incipient, & rursus ob incidentem aëris constitutionem sicciam & frigidam solitò citius evanescant, aliisque alterius speciei febribus locum faciant (a). Rectè proinde dixit SYDENHAM, eum incerto tramite vagari, qui in cura febrium anni constitutionem ob oculos non habuerit.

## THESIS LXXV.

**O**Mnes hucusque enumeratae febres interdum solitariæ sunt, interdum complicatae.

*Solitariæ* vocantur, quando nulla suspicio est alterius conjunctæ febris aut morbi alias.

*Complicatæ* appellantur, quando cum alia febre aut evidenti morbo sociatae sunt.

## THESIS LXXVI.

**C**omplicatarum febrium aliæ dicuntur idiopathicae, aliæ symptomaticæ.

*Idiopathicæ* sic vocantur ab authoribus tanquam propriæ: *symptomaticæ* verò tanquam accidentales seu consequentes febres. Dicuntur & *protopathicæ* sive primariæ aut essentiales, & *deuteropathicæ* sive secundariæ; divisione medico practico scitu per quam necessariâ, ne morbo primario neglecto symptoma, velut umbram relicto corpore, fugare incassum satagat.

## THESIS

(a) HUXHAM de Febr. iutermitt.



## THESIS LXXVII.

**F**EBRES idiopathicæ dicuntur, quæ a nullo alio morbo dependent, sed suâ sponte existunt.

Verum quidem est, omnes febres a causis prædisponentibus, qui veri jam morbi sunt in corpore præexistentes (*a*), oriri atque foveri, ut proinde omnes hoc sensu symptomaticæ dicendæ essent. Sed cùm hæ causæ prædisponentes vulgò minoris fiant, quām ut pro veris morbis, ope medicâ dignis, habeantur: hâc divisione eas febres idiopathicas appellamus, quæ se solis subsistunt, neque ab evidentiori aliquo morbo producuntur & quasi sustentantur.

## THESIS LXXVIII.

**S**Ympomaticæ sunt, quæ a morbo quodam evidentiori foventur & aluntur.

Tales ferè sunt omnes chronicæ, uti hectica, phthisica &c., quæ semper ex alio præexistente morbo nascuntur & sustentantur, neque recedunt nisi sublato eo morbo: tales itidem possunt esse multæ acutæ aliis acutis aut chronicis symptomaticè accidentes.

Veteres æquè ac recentiores varias febrium symptomaticarum species ab urgente quodam symptomate deduxerunt:

*Causum* sive febrem ardentem vocârunt eam, quæ calorem urentem & sitim inexplebilem sociatam habet.

*Leipy-*

(*a*) Vid. Thes. XIX.

*Leipyviam* ab incendio internarum & frigore extrema-  
rum partium:

*Afoden* ab anxietate & nausea:

*Heloden* a profuso sudore:

*Pbricoden* a frequentiori horrore:

*Epialam* a caloris & frigoris permisto sensu nuncupâ-  
runt. Quarum plures apud ETTMÜLLERUM & GORTERUM  
videre est. Ut plurimùm febres malignæ sunt ob peculiaria  
hujusmodi symptomata notabiliores.

*Hemitritæam* quoque symptomaticis adnumerant. In-  
terim varia est hujus febris acceptio: interdum sumitur pro  
febre maligna alternis diebus exacerbationes frigore distin-  
ctas habente, cùm aliæ exacerbationes conjunctæ febris  
quotidianæ sine algore sint (a). Interdum verò significat  
omnes febres quotidianas ex tertiana, id est, graviores al-  
ternis diebis paroxysmos habentes, sive continuæ fuerint,  
sive intermitentes (b).

Strictè autem febres symptomaticæ non a symptomate  
quodam eminentiori æstimandæ, sed speciales & veræ fe-  
bres sunt alteri evidenti morbo supervenientes: aliæ sym-  
ptomata tantùm febrilia dici merentur.

*Symptomata febrilia* alio sensu morbi sunt a febre pro-  
ducti & unà cum illa affligentes, sub quibus febris inter-  
dum ita later, ut difficulter cognosci possit (c). Quorum  
symptomatum notas & criteria sufficienter evolvit GORTER.  
in Comp. Med., & syst. prax. gener. Delitescentia febris in-  
termitt-

(a) Vid. Thef. XXXI. Num. 4.

(b) Vid. SENNERT. de Febrib. Lib. 2. Cap. 21. & JONSTON. idea  
Med. Pract. Lib. 7. Art. 4.

(c) Vid. Thef. XIV.

termittentis sub alio morbo specialiter ex sedimento lateri-  
tio in urina dignoscitur.

## THESIS LXXIX.

**P**ossunt omnes febres tam acutæ quam chronicæ,  
tam ordinariæ quam malignæ fieri symptoma-  
ticæ, dum aliis morbis aut sibi invicem symptoma-  
tico modo superveniunt.

Sic vulneri symptomatica est febris acuta ordinaria :  
hydropi non raro peripneumonia aut febris hectica phthisi-  
caque symptomaticè accidit : febri acutæ ordinariæ & sim-  
plici pleuritis aut peripneumonia vel ex sinistra curatione,  
vel regimine calidore, vel admisso frigore, vel denique  
ex condensatione phlogistica spontanea sanguinis per motum  
febrilem supervenit : variolis, dysenteriæ, pleuritidi, ictero  
non raro febres malignæ vel ex incidente constitutione epi-  
demicæ vel ex inquilino viscerum vitio symptomaticè adjun-  
guntur (a). Causum cum tertiana complicatum, & pleu-  
ritidem quartanæ supervenientem observavit v. SWIETEN  
(b) : pleuritidi aliisque inflammatoriis non raro jungi fe-  
brem biliosam, ex bile circa primas vias corrupta & accu-  
mulata, non superandam, nisi evacuatâ hac saburrâ biliosâ  
vel per vomitum vel diarrhœam, testantur obviae practi-  
corum observationes : quo casu locum habent *curationes em-  
pyricæ MARTINI RULANDI*, qui in pleuritide præmissâ ve-  
næctione passim vomitoria & purgantia exhibet.

Inter-

(a) Vid. HUXHAM de pleurit.

(b) Comment. Tom. 2. Aph. 732.

Interdum ità complicantur plures febres, ut dubium sit, quænam primaria vel secundaria dici debeat: *confusas* vocant antecessores nostri (a).

## THESIS LXXX.

**A**D modum aliorum morborum, febrium aliæ vocantur endemiacæ, aliæ epidemicæ, sporadicæ aliæ.

*Endemiacæ* dicuntur febres unius speciei, quæ certæ cùdam regioni propriæ & quasi populares sunt; ità, ut ferè omnes ibi commorantes iisdem corripi soleant ex causis vernaculis aëris, aquarum &c.

Sic quæ loca aëre humido, crasso, nebuloso, effluviis aquarum stagnantium referto squalent, febrium intermittentium feracia esse solent. Pertinaces & mali moris febres (*intermittentes*) Sturgardiæ dudum ferè endemias ex GEUDERO memorat WERLHOFF. (b).

*Epidemicæ* sunt itidem febres sub una specie grassantes, quæ quidem communibus de causis, hærentibus in aëre, vieti vel contagio, plures eodem tempore adoriuntur, sed non vernaculae aut domesticæ sunt illi loco, in quo identidem grassari solent. Hoc adjectivo appellantur pleuritides, anginæ, febres catarrhales, dysentericæ, malignæ, aliæque continuæ & intermittentes, quando populariter grassantur.

*Sporadicæ* vocantur febres diversæ speciei, quando nec turmatim, nec eodem modo plures simul, sed hinc inde quenquam afficiunt non ex causis communibus, sed singularibus tantum, illique corpori, in quod incident, propriis & inquilihis; ut dum unus continua biliosâ, alter intermittente, pleuritide alijs laborat.

## THESIS

(a) Vid. SENNETT. loc. suprà citat.

(b) Observ. de Februb. pag. 212.

## THESS LXXXI.

**D**ividuntur denique in legitimas & illegitimas.


*Legitimæ* sunt, quæ omnia phœnomena illi speciei februm, quam exhibent, propria secum habent: uti dum febris intermittens quolibet paroxysmo data *Theſi VI.* symptomata prä se fert.

GORTER eas febres legitimarum nomine intelligere videtur, quarum cauſa in universo humorum circulantium & vasorum systemate diffusa est: cum eas, quæ a bile in primis viis corrupta, aut ab aliis causis topicis, sive hinc inde in corpore alii cubi hærentibus, ortum habent, symptomaticas appellat (*a*).

*Illegitimæ* dicuntur, quando dictorum symptomatum unum alterumve abeat, aut alia insolita, neque tamen periculosa, coniuncta sunt, aliàs enim malignæ forent (*b*). Sic intermittens illegitima erit, quæ frigus ab initio vel nullum vel admodum leve habuerit; aut cujus paroxysmi novis incidentibus horroribus perturbantur. Sic pleuritis illegitima est, quæ sine notabili æstu, aut tussi, aut sine pulsu velociore & fortiore est.

Ex hoc capite illegitimæ dicuntur febres autumnales aut vernales, quando continuarum schema aliquamdiu mentitæ in intermittentes posteā dehiscere solent.

Veteres dixerunt illegitimas, quæ ob causas compositas & diversas non habebant ordinarium decursum, uti febres omnes duplicatae, triplicatae, a bile & pituita simul peccantibus oriri creditæ.



(*a*) *Prax. Med.* §. 191. Num. X.

(*b*) *Vid. Theſ. XIX.*